

箋通書述解

通書述解四十章直與太極圖說相表裏解其未易解
述其未殫述非元公誰能發太極之蘊非靖修誰能發
元公之蘊乎至論孔顏之樂元公令兩程尋所樂何事
畢竟無人說破靖修獨謂孔顏之樂者仁也非是樂這
仁仁中自有其樂耳且孔子安仁而樂在其中顏子不
違仁而不改其樂安仁者天然自有之仁而樂在其中
者天然自有之樂也不違仁者守之之仁而不改其樂
者守之之樂也斯言至矣盡矣蓋極至之理惟一仁仁
者不憂不憂自樂寧直孔顏義皇堯舜禹湯文武總不
外是四十章述解無非發明太極一圖而仁字已括圖
之義矣容城後學孫奇逢敬識

通書總論

五峯胡氏曰通書四十章周子之所述也粵若稽古孔子述三五之道立百王繼世之法孟軻氏闡楊墨推明孔子之澤以爲萬世不斬人謂孟子功不在禹下今周子啟程氏兄弟以千古不傳之妙其功蓋在孔孟之間矣人見其書之約也而不知其道之大也見其文之質也而不知其義之精也見其言之淡也而不知其味之長也

此書皆發端以示人者度越諸子直與易詩書春秋語孟同流行乎天下

朱子曰通書文雖高簡而體實淵懋且其所論不出乎通書總論

修己治人之事未嘗劇談無極之先文字之外也

問通書便可以接語孟曰此語孟較分曉精深結構得密語孟較說得闊

周子通書此近世道之源也而其言簡質如此與世之指天畫地喝風罵雨者氣象不侔

河圖出而八卦畫洛書出而九疇敘孔子于斯文興喪未嘗不推之於天若濂溪先生者其天之所畀而得乎斯道之傳者與不由師傳默契道體建圖屬書根極要領當時見而知之有程氏者遂擴大而推明之使天理

之微人事之著事物之眾鬼神之幽莫不洞然畢貫于一而周公孔子孟子之傳煥然復明於世

先生之言高極乎無極太極之妙而其實不離乎日用之間幽探乎陰陽五行之蹟而其實不離乎仁義禮智剛柔善惡之際其體用之一原顯微之無閒秦漢以來誠未有臻斯理者而其實則不外乎六經論語中庸大學七篇之所傳也

先生奮乎百世之下深探聖賢之奧仰觀造化之源而獨心得之立象著書闡發幽秘辭義雖約而天人性命之微修己治人之要莫不畢舉

通書總論

二

濂溪之圖與書雖其簡古淵源未易究測然其大旨則不過語諸學者講學致思以窮天地萬物之理而勝其私以復焉其施則善始于家而達之天下其具則復古禮變今樂政以養民而刑以肅之也是乃所謂伊尹之志顏子之學而程子傳之以覺斯人者亦豈有以外乎日用之間哉

西山眞氏曰自湯誥論降衷詩人賦物則人知性之出于天而未知其爲善也繼善成性見于繫易性無不善

述于七篇人知性之善而未知其所以善也周子因羣聖之已言而推其所未言者于圖發無極二五之妙于書闡誠源誠立之旨昔也太極自爲太極今知吾身自有太極矣昔也乾元自爲乾元今知吾心卽乾元矣有一性則有五常有五常則有百善循源而流不假人力道之全體煥然復明者周子之功也

黃氏瑞節曰周子二書眞所謂吐辭爲經者朱子之解是書也亦如解經然蓋朱子之追事周子也猶周子之追事吾孔孟也無一字不服膺焉耳常徧求其易說而

通書總論

三

不可得僅令門人度正訪周子之友傳耆之子孫求所寄姤說同人說亦已不可見矣世之相去百有餘年而其書散逸難合如此哉或謂無極二字出于老列或謂圖得之穆修或謂當時畫以示二程而未嘗有所爲書或謂二程言語文字至多未嘗一及無極字疑非周子所爲或謂周子陸詵壻也說見司馬溫公涑水記聞亦篤實長厚人也安知無所傳授或謂周子與胡文定公同師鶴林寺壽涯是皆強求其所自出而于二書未知深信者朱子一言以斷之曰不由師傳默契道體子是

周子上承孔孟之說遂定而二書與語孟並行矣

通書總論

四

通書述解卷之上

澠池曹端正夫著

誠上第一

此明太極為實理而有體用之分也

誠者聖人之本

誠者實理而无妄之謂天所賦物所受之正理也人皆有之然氣稟拘之物欲蔽之習俗誘之而不能全此者眾聖人之所以為聖人者無他焉以其獨能全此而已本謂本領之本不待作為而然耳此書與太極相表裏誠即所謂太極也

通書述解

卷之上

大哉乾元萬物資始


此二句引易以明之大哉贊之辭也乾者純陽之卦其義為健乃天德之別名也元始也資取也言乾道之元萬物所取以為始者

誠之源也

是乃實理流出以賦於人之本如水之有源即圖之陽動而太極之用所以行也

乾道變化各正性命

此二句亦易文變者化之漸化者變之成天所賦為



命物所受爲性言乾道變化而萬物各得受其所賦之正理如云五行之生各一其性

誠斯立焉

則實理於是乎立而各爲一物之主矣如鳶之飛魚之躍火之上水之下皆一定而不可易卽圖之陰靜而太極之體所以立者也

純粹至善者也

純不雜也粹無疵也此言天之所賦物之所受皆實理之本然無不善之雜也

通書述解

卷之上

二

故曰

復引易文以證之

一陰一陽之謂道

陰陽氣也形而下者也所以一陰一陽者理也形而上者也道卽理之謂也此句還證誠之源誠斯立焉

一節

繼之者善也

繼之者氣之方出而未有所成之謂也善則理之方行而未有所立之名也陽之屬也誠之源也此句又

證誠之源一節

成之者性也

成則物之已成者也如在天成象在地成形性則理之已立者也陰之屬也誠之立也此句又證誠斯立焉一節然而繼成字與陰陽字相應指氣而言善性字與道字相應指理而言此夫子所謂善是就一物未生之前造化原頭處說善乃重字爲實物若孟子所謂性善則就成之者性說是生以後事善乃輕字此性之純粹至善耳其實由造化原頭處有是繼之

通書述解

卷之上

三

元亨誠之通

者善然後成之者性時方能如此之善孟子之所謂性善實淵源於夫子之所謂善而非有二本也其下復卽乾之四德以明繼善成性之說

利貞誠之復

元始亨通而通云者實理方出而賦於物善之繼也利遂貞正而復云者萬物各得而藏於己性之成也此於圖已爲五行之性矣何也蓋四德則陰陽各二而誠無不貫安得不謂五行之性乎

大哉易也性命之源乎

易者交錯代換之名凡天地間之陰陽交錯而實理
流行一賦一受於其中乃天地自然之易而爲性命
所出之源也作易聖人得之於仰觀俯察之間則卦
爻之立由是而已故義易以交易爲體而往此來彼
焉以變易爲用而時靜時動焉及周文王彖卦周公
明爻而命曰周易復得孔子作傳而發揮之則性命
之微彰矣周子之書本之其旨深哉

誠下第二

此言太極之在人者所謂思誠者人之道也

通書述解

卷之上

四

聖誠而已矣

聖人之所以聖不過全此實理而已卽所謂太極也
聖人時靜而太極之體立時動而太極之用行則聖
人一太極焉

誠五常之本百行之源也

五常仁義禮智信五行之性也百行孝弟忠順之屬
萬物之象也實理全則五常不虧而百行修矣是則
五常百行之本之源一誠而已

靜無而動有

方靜而陰誠固未嘗無也以其未形而謂之無也及其動而陽誠非至此而後有也以其可見而謂之有耳

至正而明達也

靜無則至正而已動有然後明與達者可見也朱子又曰某近看中庸鬼神一章正是發明顯微無間只是一理處且如鬼神有甚形迹然人却自然有畏敬之心以承祭祀便如真有一物在上左右此理亦有甚形迹然人却自然有秉彝之性才存主著這裏便

通書述解

卷之上

五

自見得許多道理參前倚衡雖欲頃刻離而遁之而不可得只爲至誠貫徹實有是理無端無方無二無雜方其未感寂然不動及其既感無所不通濂溪翁所謂靜無而動有至正而明達者於此亦可以見之

五常百行非誠非也

非蓋無之意非誠則五常百行皆無其實所謂不誠無物者也

邪暗塞也

誠苟不存則靜而不正故邪動而不明不達故暗且

塞也是故學聖希賢惟在存誠則五常百行皆自然
無一不備也

故誠則無事矣

事與事斯語之事同謂用功也言誠則庶理自然無
一不備不待思勉而從容中道矣

至易而行難

實理自然故易人偽奪之故難

果而確無難焉

果者陽之決確者陰之守決之勇守之固則人偽不

通書述解

卷之上

六

能奪之矣此是一事而首尾相應果而不確卽無所
守確而不果則無所決二者不可偏廢猶陰陽不可
相無也朱子又因論良心與私欲交戰須立定根脚
戰退他因舉濂溪說果而確無難焉須是果敢勝得
私欲方確然守得這道理不遷變

故曰

故孔子答顏子問爲仁之語有曰

一日克己復禮天下歸仁焉

克勝也己身之私欲也復反也禮者天理之節文也

歸猶與也且克去己私復由天理天下之至難也然其機可一日而決其效至於天下歸仁果確之無難

如此 孟子曰誠者天之道也思誠者人之道也固本於孔子所謂誠者天之道誠之者人之道而周子此書上章即孔孟上句之意而下章則下句之意也謂周子上接孔孟之傳良有以夫

誠幾德第三 此明太極二五之在人而有體用之分夫疑缺字人品之不同也

誠無爲

誠則實理自然何爲之有即太極也


幾善惡

幾者動之微善惡之所由分也蓋動於人心之微則

通書述解

卷之上

天理固當發見而人欲亦已萌乎其閒矣此陰陽之象也或問誠無爲幾善惡朱子曰此明人心未發之體而指其未發之端蓋欲學者致察於萌動之微知所決擇而去取之以不失乎本心之體而已或疑以爲有類於胡子同體異用之云遂妄以意揣量爲圖如後



善惡雖相對當分賓主天理人欲雖分派必省宗僻
自誠之動而之善則如木之自本而幹自幹而末上
下相達則道心之發見天理之流行此心之本主而
誠之正宗也其或旁榮側秀若寄生疣贅者此雖亦
誠之動而人心之發見私欲之流行所謂惡也非心
之固有蓋客寓也非誠之正宗蓋庶孽也苟辨之不
早擇之不精則客或乘主孽或代宗矣學者能於萌
動幾微之間而察其所發之向背凡直出者爲天理
旁出者爲人欲直出者爲善旁出者爲惡直出者因

遺書述解

卷之上

八

有旁出者橫生直出者有本旁出者無源直出者順
旁出者逆直出者正旁出者邪而吾於直出者利導
之旁出者遏絕之功力既至則此心之發自然出於
一途而保有天命矣於此可以見發之前有善無惡
而程子所謂不是性中原有此兩件相對而生又云
凡言善惡皆先善而後惡蓋謂此也若以善惡爲東
西相對彼此角立則天理人欲同出一源未發之前
已具此兩端所謂天命之性亦甚汙雜矣此胡氏同
體異用之意也曰此說得之

德愛曰仁宜曰義理曰禮通曰智守曰信

道之得於心者謂之德德則有體焉有用焉何謂體仁義禮智信是也何謂用愛宜理通守是也惟其別有是五者之用而因以名其體焉卽五行之性也且幾善惡便是心之所發處有箇善有箇惡了德便是善底爲聖爲賢只是這材料做

性焉安焉之謂聖

性者獨得於天安者本全於己聖者大而化之之稱此不待學問勉強而誠無不立幾無不明德無不備

通書述解

卷之上

九

者也

復焉執焉之謂賢

復者反而至之執者保而持之賢者才德過人之稱此思誠研幾以成其德而有以守之也

發微不可見充周不可窮之謂神

發之微妙而不可見充之周徧而不可窮則聖人之妙用而不可知也非聖人之上復有所謂神人也

此三

句就人所到地位而言卽盡夫上三句之理而所到有淺深也性焉安焉之謂聖就聖人性分上說發微不可見充周不可窮之謂神是他人見其不可測耳○勉齋黃氏曰誠幾德一段文理粲然只把體用兩

箇字來講他便見誠是體幾是用仁義禮智信是體
愛宜理通守是用誠幾只是德學來做在誠爲仁則
在幾爲愛在誠爲義則在幾爲宜性焉復焉發微不
可見是體安焉執焉充周不可窮是用性如堯舜性
之也復如湯武反之也是既失了却再復得安而行
之不恁地辛苦執則是擇善而固執須恁地把捉發
是源頭底充是流出底其發也微而不可見其
充也周而不可窮是謂神指聖而不可知者也

聖第四

此承上章而言聖人之所以聖者誠神幾也

寂然不動者誠也

本然而未發者實理之體卽太極之靜而陰也

感而遂通者神也

善應而不測者實理之用卽太極之動而陽也

通書述解

卷之上

十

動而未形有無之間者幾也

動靜體用之間介然有頃之際則實理發見之端而
眾事吉凶之兆也且太極圖中只說動而生陽靜而
生陰此又說箇幾此是動靜之間又有此一項似有
而未有的時在人識之耳

誠精故明

誠則清明在躬氣志如神精而明也

神應故妙

神則不疾而速不行而至應而妙也

幾微故幽

幾則理雖已萌而事則未著微而幽也

誠神幾曰聖人

惟性焉安焉之謂聖人者則精明應妙而有以動其

幽微矣

節齋蔡氏曰誠者寂也靜也而具動靜之理神感也動也而妙動靜之用蓋誠為神本神

為誠用本不動而用動故誠則靜意多神則動意多要其實則各兼動靜陰陽也幾誠發而為神之始也

在靜無而動有之閒雖動而微亦未可見實為神之端也

慎動第五

此明幾之意而見動之邪正為身之吉凶則不容於不謹也

動而正曰道

通書述解

卷之上

十一

動之所以正以其合乎眾所共由之道也

用而和曰德

用之所以和以其得道於身而無所待於外也

匪仁匪義匪禮匪智匪信悉邪也

所謂道者仁義禮智信之五常而已非此則其動也

邪矣

邪動辱也

不正而動如同流合汙則身之辱也

甚焉害也

又甚焉小則殞身滅性大則覆宗絕祀以其動之無得於道則其用不和而效若是焉

故君子慎動

故君子必謹其所動動必以正則和在其中矣

節齋黃氏

榛齋氏疑曰道即太極流行之道德即五性之德動而正即前所謂幾也用而和即後所謂中節也

道第六

此明聖人之道而見動之慎幾之明也

聖人之道仁義中正而已矣

聖人即伏羲神農黃帝堯舜禹湯文武周公孔子也道則得于天而全于己而同於人者也中即禮正即

通書述解

卷之上

十一

智仁義禮智之道乃其性分之所固有日用之所當行固非淺陋固執之可倫亦非虛無寂滅之可擬而已矣者無他之辭也

守之貴

守仁義禮智則天德在我何貴如之

行之利

行仁義禮智則順理而行何往不利

廓之配天地

廓充也配合也人而充其仁義禮智之道則與天地

合其德非有待於外也故曰克其本然並立之全體而已矣

豈不易簡

道體本然故易簡易者不雜之謂簡者不煩之謂

豈爲難知

人所固有故易知

不守不行不廓耳

但世之人不肯行此道不肯充此道耳言爲之則是而嘆學者自失其幾也

通書述解

卷之上

七

師第七

此明師道爲天下善也

或問曰曷爲天下善

或人問於周子曰曷者可以善天下之人心善天下之治道乎

曰師

周子答曰惟師道可以爲天下善

曰何謂也

或人復問如何說

曰性者剛柔善惡中而已矣

此所謂性以氣稟而言也太極之數自一而二剛柔也自一而四剛善剛惡柔善柔惡也遂加其一中也以為五行濂溪說性只是此五者他又自有說仁義禮智底性時若論氣稟之性則不出五者然氣稟底性只是那四端底性非別有一種性也所謂剛柔善惡之中者天下之性固不出此五者然細推之極多般樣千般百種不可窮究但不離此五者爾

性只是理然無

那天氣地質則此理沒安頓處但得氣之清明則不蔽固此理順發出來蔽固少者發出來天理勝蔽固多者則私欲勝便見得本源之性無有不善只被氣質昏濁則隔了學以反之則天地之性存矣故說性

通書述解

卷之上

古

不達

或人不達其旨

曰

周子復與之言剛柔善惡之意

剛善爲義爲直爲斷爲嚴毅爲幹固

陽剛之善有此五者

惡爲猛爲隘爲強梁

案原本脫惡爲猛爲隘爲強梁八字今照周子通書補入

柔善爲慈爲順爲異

陰柔之善有此三者

惡為懦弱為無斷為邪佞

案原本脫惡為懦弱為無斷為邪佞十字今照周子通書

補

蓋剛柔固陰陽之大分而其中又各有陰陽以為善

惡之分焉惡者固為非正而善者亦未必皆得乎中

也

惟中也者和也

周子五性之中只箇中最好底性故以和為中

中節也

通書述解

卷之上

十五

以其所發皆中乎節也

天下之達道也

這便是天下眾人所共由之道也

聖人之事也

這便是伏羲以來列聖所共行之事此以得性之正

而言也聖人之事豈出性分之外哉然其以和為中

與中庸不合蓋就已發無過不及者言之耳如書所

謂允執厥中者也

北溪陳氏曰中有二義有已發之中有未發之中未發是就性上說

已發是就事上說已發之中當喜而喜當怒而怒那恰好處無過不及便是中此中即所謂和也所以周

子亦曰中也者和也
是指已發之中而言

故聖人立教

故聰明睿智能盡其性之聖人出為億兆之君師而
修道立教焉

俾人自易其惡

而使天下之人各自變易其惡則剛柔皆善有嚴毅
慈順之德而無強梁懦弱之病矣

自至其中而止矣

自至其中則其或為嚴毅或為慈順也又皆中節而

通書述解

卷之上

六

無太過不及之偏矣

張子云為學大益在自求變化
氣質程子曰學至氣質變方是

有功皆
此意也

故先覺覺後覺闇者求於明而師道立矣

故心上先覺悟之人而又覺悟那後覺悟之人心上
昏闇之人而又求那心上通明之人一以傳道為心
一以求道為心則師道立焉師者所以攻人之惡正
人之不正而止矣

師道立則善人多

師道既立則善人自多

善人多則朝廷正而天下治矣

善人既多則朝廷之上人皆正人事皆正事而曾天

之下一歸于治而已此師道所以爲天下善也

此章所言

剛柔卽易之兩儀各加善惡卽易之四象又加倍以八卦而此書及圖則止於四象以爲水火金木而卽其中以爲土蓋道體則一而人之所見詳畧不同但於本體不差則並行而不悖矣

幸第八

此明人以聞過爲幸而有恥又爲幸之大者也

人之生不幸不聞過

不聞過人不告也且人受天地之中以生無有不善故皆可以爲堯舜而參天地以贊化育焉則孰不可

通書述解

卷之上

七

立于無過之地乎然而不能無過者或氣稟之偏或私欲之誘或習俗之染得人告之而聞焉則將變化消釋以復其初幸何如哉不然則過不改性同飛走不足爲萬物之靈矣非不幸而何

大不幸無恥

無恥我不仁也且仁者天地生物之心而人所受以生者所以爲一心之全德萬善之總名而爲參天地贊化育之本體焉人而不仁則生理息矣人道滅矣而不以爲恥則尤不足爲萬物之靈也非大不幸而

何

必有恥則可教

有恥則能憤發而受教

聞過則可賢

聞過則知所改而爲賢然不可教則雖聞過而未必能改矣以此見無恥之不幸爲大也

思第九

此言聖學之事而見其主于心也

洪範曰

洪範周書篇名而有言曰

通書述解

卷之上

六

思曰睿

思心之官也睿通也人而能思則通矣

睿作聖

睿而進焉則自然無不通而爲聖人也

無思本也

無思誠也誠者聖人之本

思通用也

思通神也神者聖人之用

幾動於彼

事之幾感于外者不一

誠動於此

心之誠應于中者惟一

無思而無不通爲聖人

不待有所思而無所不通是聖人所謂誠神幾曰聖人也

不思則不能通微

通微睿也不思索則不能通乎幾微

不睿則不能無不通

通書述解

卷之上

五

無不通聖也不通微則不能造乎聖人

是則無不通生於通微

謂聖生于睿

通微生于思

睿生於思也

故思者聖功之本而吉凶之幾也

思之至可以作聖而無不通其次亦可以見幾通微而不陷於凶咎幾是事之端緒有端緒方有討頭處這方是用得思

易曰君子見幾而作不俟終日

幾者吉凶之見案見字上疑脫先字者也作猶行也謂避禍也

不待終日去之速也言明哲之君子見幾明而避禍

速也即可以速則速之時耳周子引此以證睿也

又曰知幾其神乎

知幾比之見幾則又神妙不測非他人所可知耳引

之以證聖也

志學第十

此言所志所學之正而見聖賢之心也

聖希天

通書述解

卷之上

三

希望也字本作晞大而化之之謂聖人不敢自以為

足而望同於天則法天而行書曰明王奉若天道無

非法天者大事大法天小事小法天則聖人一動一

靜即太極之動靜焉

賢希聖

才德出眾之賢人不敢自以為勝而望同於聖人則

又法聖人而行焉孟子曰乃所願則學孔子又曰法

先王而過者未之有也

士希賢

士學者之稱也學者見賢而思齊焉

伊尹顏淵大賢也

伊尹湯之學焉而後臣之者也顏淵孔子弟子也二

人學之大者也

伊尹恥其不為堯舜

堯唐帝名舜虞帝名二帝乃五帝之盛帝百聖之至聖為人倫之至為君道之極焉故伊尹欲其君為堯舜而不得則其心媿恥

一夫不得其所若撻于市

通書述解

卷之上

三

撻于市恥之甚也且堯舜君民一民饑曰我饑之一民寒曰我寒之一民失所曰時予之辜伊尹以一夫不得其所而媿恥之甚者以己不能左右厥辟宅師其心亦堯舜之心也

顏淵不遷怒

遷移也怒于甲者不移于乙

不貳過

貳復也過于前者不復于後顏子克己之功至于如此

三月不違仁

則無私欲而有其德也二人所為皆賢人之事也

志伊尹之所志

伊尹之志致君澤民是公天下之心士希賢而志尹尹之所志則亦不志于私矣

學顏子之所學

顏子之學克己復禮傳聖人之道士希賢而學顏子之所學則又豈自小之學哉

過則聖

志學伊顏而過之則為聖人

通書述解

卷之上

三

及則賢

志學伊顏而及之則為賢

不及則亦不失於令名

志此志學此學而雖不到伊顏地位則亦不失於善名三者隨其用之淺深以為所至之近遠不失令名

以其有為善之實也

胡氏曰周子患人以發策決科榮身肥家希世取寵為事也故

曰志伊尹之所志患人以廣聞見工文辭矜智能慕空寂為事也故曰學顏子之所學人能志此志而學

此事則知此書之包括至大而無窮矣。或問伊尹之志顏子之學固如此矣而却不知伊尹之學顏子

之志如何端曰伊尹之志固是在於行道然道非學無以明不明何以行耶大抵古人之學本欲行道伊尹耕於有莘之野而樂堯舜之道凡所以治國平天下者無不理會但方處畎畝之時不敢言必於大用耳及三聘幡然便一向如此做去其自言曰予天民之先覺也予將以斯道覺斯民也此便是堯舜事業看二典之書堯舜所以卷舒作用直如此熟若雖志于行道而自家所學原未有本領如何便能舉而措之天下乎若夫顏子之學固欲明道然而又未嘗不欲其道之行也觀其問爲邦而夫子告以四代之禮樂及放鄭聲遠佞人其言志一則曰願無伐善無施勞二則曰願得明王聖主輔相之敷其五教導之以禮樂使民室家無離曠之思千載無戰鬪之患而勇辨者無所施用焉然則顏子之志又豈非堯舜君民而公天下之心哉

順化第十一

此明天地聖人同一道而已也

通書述解

卷之上

三

天以陽生萬物

天以陽氣生萬物觀春夏之生長可見矣

以陰成萬物

天以陰氣成萬物觀秋冬之收成可見矣

生仁也

天之生物之道便是仁

成義也

天之成物之道便是義蓋陰陽無二氣仁義無二道

道氣無二機只是一箇消長而已

故聖人在上

故聖人在君師之位而參天地以贊化育

以仁育萬物

則以所得天地生物之心而曰仁者養萬物而使之無不遂其生

以義正萬民

以所得天地成物之心而曰義者正萬民而使之無不得其正所謂定之以仁義

天道行而萬物順

通書述解

卷之上

三

天道之仁義行而萬物順者榮悴開落之不違時也

聖德修而萬民化

聖德之仁義修而萬民化者語默行止之各得其正也

大順大化不見其迹

天地之大順聖人之大化不待徵於色發於聲故不見其迹

莫知其然之謂神

人莫知其所以然之妙故謂之神焉此言天地聖人

其道一也

故天下之眾本在一

天下之本在君而君正莫不正也

道豈遠乎哉

君之道在心則至近也

術豈多乎哉

心之術在仁義則至簡也

治第十二

此明治道之要在乎君心之一而已也

十室之邑人人提耳而教且不及

通書述解

卷之上

三

十室小邑也十室之小邑人至少而宰之者欲逐簡人提耳而教誨之尙且不能及

况天下之廣兆民之眾哉

何況君天下之至多者可逐簡人親自教誨之而使

同歸於善哉

曰純其心而已矣

純者不雜之謂心謂人君之心言君天下而欲兆民

一於善只在純一人之心而止矣

仁義禮智四者動靜言貌視聽無違之謂純

仁義禮智五行之德也動靜陰陽之用而言貌視聽
五行之事也德不言信事不言思者欲其不違則固
以思爲主而必求是四者之實矣

心純則賢才輔

君心純一則賢而有德才而有能自輔相之何也蓋
君取人以身臣道合而從也

賢才輔則天下治

眾賢各任其職則不待人人提耳而教而自無不歸
於善天下之治平爲何如哉

通書述解

卷之上

三

純心要矣

心不純則不能用賢故君以純心爲要道

用賢急焉

不用賢則不能宣化故君以用賢爲急務

禮樂第十三

此論禮樂而見定之以中
正仁義而主靜之意也

禮理也

禮陰也故理焉

樂和也

樂陽也故和焉

陰陽理而後和

合而言之則陰陽各得其理而後二氣和也

君君臣臣父父子子兄弟兄弟夫婦婦

人倫之閒各盡其道各安其分無不理且和焉

萬物各得其理然後和

天高地下萬物散殊而無不各得其理然後流而不息合同而化而無不和也

故禮先而樂後

以其先理而後和所以不曰樂禮而曰禮樂云程子

通書述解

卷之上

三

論敬則自然和樂亦此理也學者不知持敬而務爲和樂鮮不流於慢者

務實第十四

此言學當務實而不可有近名之意也

實勝善也

學者實勝於名則善矣

名勝恥也

若名勝於實則可恥之甚

故君子進德修業孳孳不息務實勝也

故君子之學進己之德修己之業勤勉而不知所以

務實之勝而已

德業有未著則恐恐然畏人知遠恥也

若己之德業有未進則其心常恐怕有善名聞於人所以遠恥辱也

小人則僞而已

小人則無進德修業之實而有沽名釣譽之僞焉耳

故君子曰休

休美也君子則實修而無名勝之恥故休

小人曰憂

通書述解

卷之上

美

小人則名勝而無實勝之善故憂書曰作德心逸日

休作僞心勞日拙亦此意也

愛敬第十五

此言君子克致愛敬之道也

有善不及

設問人或有不善而我不能及則如之何

曰不及則學焉

答言人有善而我不能及則當學其善而已

問曰有不善

問人有不善則何以處之

曰不善則告之不善

答言人有不善則告之以不善

且勸曰庶幾有改乎

而且勸其改之可也蓋告之者恐其不知此事之爲不善也勸之者恐其不知不善之可改而爲善也

斯爲君子

此爲君子之用心也

有善一不善二則學其一而勸其二

亦答詞也有善則心一不善則心二人有善惡之雜

通書述解

卷之上

三

則我當學其善而勸其惡

有語曰

又答言有人告之言

斯人有是之不善非大惡也

此人有此過不係大惡者

則曰孰無過

聞人有過雖不得見而告勸之亦當答言人孰無過

乎

焉知其不能改

焉何也言何以知此人之不能改過耶

改則爲君子矣

若能改過則便是君子此則冀其或聞而自改也

不改爲惡

有心悖理謂之惡無心失理謂之過人不待別爲不善方謂之惡只如過而不改是有心便謂之惡

惡者天惡之彼豈無畏耶烏知其不能改

案原本脫惡者天惡之彼

豈能無畏耶烏知其不能改十七字照周子通書補

故君子悉有眾善

通書述解

卷之上

三

善無不學故悉有眾善

無弗愛且敬焉

惡無不勸故不棄一人于惡惟不棄一人于惡則無不用其愛敬矣且君子非欲使人愛敬而後爲此亦盡吾當然之道而已而人之愛敬不期而至焉

動靜第十六

此明太極圖之意而見造化之妙也

動而無靜靜而無動物也

物謂萬物而人在其中也惟其有形則滯于一偏是謂形而下之器也形而下者則不能通故方其動時

則無了那靜方其靜時則無了那動如水只是水火只是火以人言之語則不默默則不語以物言之飛則不植植則不飛是也

動而無動靜而無靜神也

神則卽此理耳所謂形而上之道也則不離于形而不囿于形故神而莫測方其動時未嘗不靜故曰無動方其靜時未嘗不動故曰無靜

動而無動

則動中有靜焉

通書述解

卷之上

三

靜而無靜

則靜中有動焉

非不動不靜也

謂不是靜而不動動而不靜也蓋靜而能動則陰中有陽焉動而能靜則陽中有陰焉錯綜無窮是也

物則不通

上所謂物則滯於一形之偏而不能通

神妙萬物

上所謂神則妙於萬物之中而無不通此兩句又結

上文起下意

水陰根陽火陽根陰

水陰也以河圖言而生於一以太極言則陽變而生
水則本乎陽也火陽也而生於二以太極言則陰合
而生火則本乎陰也且水陰物火陽物也形而下者
也所以根陰根陽理也形而上者也所謂神妙萬物
者如此

五行陰陽陰陽太極

此卽太極圖說所謂五行一陰陽陰陽一太極者以

通書述解

卷之上

神妙萬物之體而言也

四時運行萬物終始

此卽太極圖說所謂五氣順布四時行焉無極之真
二五之精妙合而凝者以神妙萬物之用而言也

混兮闢兮其無窮兮

體本則一故曰混用散而殊故曰闢一動一靜其運

如環之無窮此兼舉其體用而言也

混言太極闢言
爲陰陽五行以

後故末句曰其無窮兮言既闢之後爲陰陽五行以
後爲萬物無窮盡也。此章發明圖意更宜參考。
或問周子之語言合胡不自萬而一言開胡不自一
而萬勉齋黃氏曰周子之言造化至五行處是一闢

隔自五行而上屬乎造化自五行而下屬乎人物所以太極說到四時行焉却說轉從五行說太極又從五行之生說各一其性說出至變化無窮蓋天地造化分陰分陽至五行而止五行既具則由是而人物也有太極便有陰陽有陰陽便有五行三者初無斷際至此若不說合却恐將作三件事認了所以合而謂之妙合非昔開而今合莫之合而合也至於五行既凝而後有男女男女既交而後生萬物此却是其次第故自五行而下節節開說然其理氣未嘗有異則恐未嘗不合也

樂上第十七

此論古今之樂而見治亂之迹也

古者聖王制禮法

古者聖王謂伏羲神農黃帝堯舜禹湯文武之聖人而王天下者心天地之心道天地之道而爲人倫之

通書述解

卷之上

三

至建中和之極所以制爲禮儀法度

修教化

脩明德教道化

三綱正

綱綱上大繩也三綱者夫爲妻綱父爲子綱君爲臣綱也由是三綱正焉

九疇敘

疇類也九疇者一五行二五事三八政四五紀五皇極六三德七稽疑八庶徵九福極也由是九疇敘焉

百姓太和

由是民無不和焉

萬物咸若

若順也由是而物無不順焉此所謂理而後和也

乃作樂

乃者繼事之詞樂謂金石絲竹匏土草木八音之樂也言聖王於天下理而和之後乃作樂焉

以宣八風之氣

八風者八方之風東北方曰條風東方曰明庶風東

通書述解

卷之上

三

南方曰清明風南方曰景風西南方曰涼風西方曰闐闐風西北方曰不周風北方曰廣莫風聖王作八音之樂以宣八方之風宣所以達其理之分

以平天下之情

人情最易流也而聖王作樂以平天下之人情平所以節其和之流

故樂聲淡而不傷

聖王之樂聲平淡之中自然而和故不傷謂不害於和也

和而不淫

聖王之樂聲和樂之中自然而正故不淫謂不失其正也

入其耳感其心莫不淡且和焉

聖王之樂聲入乎人之耳感乎人之心則莫不淡而和也淡者理之發和者和之爲先淡後和亦主靜之意也

淡則欲心平

所發者淡則私欲之心自平定

通書述解

卷之上

三

和則躁心釋

所爲者和則躁急之心自消釋古聖賢之論樂曰和而已此所謂淡蓋以今樂之妖艷形之而後見其本于莊正齋肅之意故希簡而寂寥耳

優柔平中德之盛也

欲心平故平中躁心釋故優柔則民德之盛可知

天下化中治之至也

溥天之下皆化於中道則治道之至也可見言聖人作樂功化之盛如此或曰化中當作化成本易聖人

久於其道而天下化成之意也

是謂道配天地古之極也

此言聖人道配天地而爲古之至極也

後世禮法不修

後世則三代之末及秦漢而下禮法教化則不修明

政刑苛紊

政事刑法則又煩亂

縱欲敗度

上則縱欲以敗度所謂流連荒亡無不爲也

通書逃解

卷之上

下民困苦

則下民之困苦有不聊生者矣

謂古樂不足聽也

乃言古聖王之樂不足聽

代變新聲

而代變爲新聲之樂

妖淫愁怨

廢禮敗度故其聲不淡而妖淫政苛民困故其聲不

和而愁怨

導欲增悲不能自止

惟其聲之妖淫也故足以導人之欲焉惟其聲之愁怨也故足以增人之悲焉二者使人肆情縱欲而不能自止

故有賊君棄父輕生敗倫不可禁者矣

導欲不止而至於輕生敗倫之不可禁焉增悲不止而至於賊君棄父之不可禁焉

嗚呼

周子復嘆息而言

通書述解

卷之上

三

樂者古以平心今以助欲

古樂用之平人之心而今樂用之助人之欲而已

古以宣化今以長怨

古樂用之宣其化而今樂用之長其怨而已蓋樂有

古今之異淡與不淡和與不和而已

不復古禮不變今樂而欲至治者遠矣

復古禮然後可以變今樂今樂

案今樂二字疑衍

所謂禮而

後和也苟不復古禮則禮非其禮矣不變今樂則樂

非其樂矣無禮樂之化而欲天下至治者不其遠哉

樂中第十八 此明古樂之功效而見治道之至也

樂者本乎政也

聖人所作之樂本乎聖人所行之政也聖人爲政以

德德惟善政政在養民

政善民安則天下之心和

政善則民無不安民安則心無不和

故聖人作樂以宣暢其和心

故聖人因之而作樂以宣暢民之和心

達於天地

通書述解

卷之上

三

以天下之和心通達於天地

天地之氣感而太和焉

且人爲天地之心心和則氣和此天地之氣所以感

而自然無不和也

天地和則萬物順

天地之氣既和則萬物自無物不順

故神祇格

格至也幽足以感神而神祇來格

鳥獸馴

微足以感物而鳥獸馴致是則聖人之作樂既非無因而強作而其制作之妙又能真得其聲氣之元謂黃鍾一宮定故其志氣天人交相感動而其效如此

樂下第十九

此復論古今之樂而見治亂之由也

樂聲淡則聽心平

淡則希簡寂寥之聲而有莊正齋肅之意樂聲如此則聽者之心自然平定

樂辭善則歌者慕

善者典雅簡古之詞而有深潛醲飫之味樂辭如此

通書述解

卷之上

三

則歌者之心自然愛慕

故風移而俗易矣

此先王之樂所以能移易天下之風俗而使之淳且

美焉

妖聲艷辭之化也亦然

若夫後世妖淫之聲美艷之辭之化民也效亦如此但能導欲增悲而至于輕生敗倫賊君棄父則天理

滅而人偷息矣哀哉

聖學第二十

此明聖人可學而至而要不外乎一心也

聖可學乎

設問聖人可學而至乎

曰可

答言可

曰有要乎

又設問學聖人有要乎

曰有

答言有

請問焉

通書述解

卷之上

卑

設問請問其要

曰一爲要

答言一之一字爲聖賢之要一卽太極是純一不雜之謂也

一者無欲也

只是純然是箇天理無一點私欲且無欲便覺自在人只爲有欲此心便千頭萬緒做事便有始無終小事尙不能成况可學聖人耶然周子只說一者無欲也這話頭高卒急難湊泊常人如何便得無欲故伊

川只說一箇敬字教人只就敬上捱去庶幾執捉得
定有箇下手處

無欲則靜虛動直

靜虛卽陰靜是心之體動直卽陽動是心之用

靜虛則明明則通

心纔虛便明明則見道理透徹故通通者明之極也

動直則公公則溥

心纔直便公公則自無物我之間故溥溥者公之極也

通書述解

卷之上

望

明通公溥庶矣乎

明而至於通則靜而動焉公而至於溥則動而靜焉

况明配木仁元通配火禮亨公配金義利溥配水智

貞如此陰陽合德而聖人其庶矣乎

此章之旨最爲要切然其辭義

明白不煩訓解學者能深玩而力行之則有以知無極之真兩儀四象之本皆不外乎此心而日用閒自無別用力處矣

